

## **ДЭЭД БОЛОВСРОЛЫН СУРГАЛТЫН БАЙГУУЛЛАГАД СУРАЛЦАГЧДАД ОЛГОХ БАЯН-ӨНДӨР СУМЫН ОЮУТНЫ ТЭТГЭЛЭГТ ХӨТӨЛБӨР**

### **Нэг. Нийтлэг үндэслэл**

1.1. Тус хөтөлбөр нь Баян-Өндөр сумын ерөнхий боловсролын сургуулийг төгссөн, суралцах хугацаандаа сурлага, урлаг, спортоор бусдыгаа манлайлж тэргүүлсэн, нийгмийн идэвх зүтгэлтэй, суралцах чин хүсэл эрмэлзэлтэй суралцагчийг урамшуулж дэмжих мөн Орхон аймаг Баян-Өндөр суманд үйл ажиллагаа явуулдаг / магадлан итгэмжлэгдсэн / их дээд сургуулийг сонгон суралцах хүсэл зорилготой, ирээдүйн чадварлаг боловсон хүчин бэлтгэхэд энэхүү хөтөлбөрийн гол зорилго оршино.

1.2. Дээд боловсролын сургалтын байгууллагад суралцагчийн сургалтын төлбөрт дэмжлэг үзүүлэхэд зориулан олгох буцалтгүй мөнгөн тусламжийг “Оюутны тэтгэлэг” гэнэ.

### **Хоёр. Суралцагчийн тэтгэлэг**

2.1. Тус тэтгэлэг нь Баян-Өндөр суманд үйл ажиллагаа явуулж буй /магадлан итгэмжлэгдсэн/ Их, дээд сургуулийн бакалаврын өдрийн хөтөлбөрийг сонгон суралцах суралцагчид энэхүү хөтөлбөрийн тэтгэлэг олгогдоно.

2.2. Оюутны тэтгэлэг нь сургалтын төлбөрийн 2.500.000 /хоёр сая таван зуу мянга/ төгрөг хүртэлх байна.

2.3. Оюутны тэтгэлэг хүссэн суралцагчийн холбогдох материалыг жил бүрийн “07 дугаар сарын 01-ээс 09 дүгээр сарын 10-ны дотор Баян-Өндөр сумын Засаг даргын Тамгын газрын Нийгмийн бодлогын хэлтэст хүлээлгэн өгнө.

2.4. Оюутны тэтгэлэг авах хүсэлт ирүүлсэн иргэдийн материалыг хянан судалж, сонгон шалгаруулах ажлыг сумын Засаг даргын захирамжаар байгуулагдсан ажлын хэсэг хариуцан зохион байгуулж, шаардлага хангасан материалыг сумын Засаг даргын зөвлөлийн хурлаар хэлэлцэн шийдвэрлэнэ.

2.5 Баян-Өндөр сумын Засаг даргын Тамгын газартай хамтран ажиллах гэрээтэй дундын зуучлалын байгууллагаар дамжуулан гадаадын их дээд сургуульд суралцах Баян-Өндөр сумын харьяалалтай суралцагчид хөтөлбөрөөс /нэг удаа/ дэмжлэг үзүүлж болно.

### **Гурав. Тэтгэлэг олгоход тавигдах шаардлага**

3.1. Оюутны тэтгэлэг хүсэгч нь Орхон аймгийн Баян-Өндөр сумын Ерөнхий боловсролын сургуулийг төгссөн Баян-Өндөр сумын харьяалалтай суралцагч байх.

3.2. Тус тэтгэлэгт бүтэн өнчин, хагас өнчин, эцэг эх эсвэл суралцагч өөрөө хөгжлийн бэрхшээлтэй, хөдөлмөрийн чадвараа 70-аас дээш алдсан гишүүнтэй өрхийн суралцагч бол давуу эрх эдэлнэ.

3.3. Оюутны тэтгэлэг хүсэгч нь Баян-Өндөр суманд үйл ажиллагаа явуулдаг /магадлан итгэмжлэгдсэн/ их дээд сургуулийг сонгон суралцагч, нийгмийн идэвх зүтгэлтэй, сурлага, урлаг спортоор бусдыгаа манлайлагч, суралцагч байх.

3.4. Их дээд сургуульд оюутны тэтгэлэг хүссэн суралцагч нь элсэлтийн ерөнхий шалгалтад /500 ба түүнээс дээш/ оноо авсан байх.

3.5. Оюутны тэтгэлэгт хамрагдах хүсэлтэй анхлан суралцагчийн элсэлтийн ерөнхий шалгалтын босго оноо 500 ба /курс ахиж/ үргэлжлүүлэн /II.III.IV/ суралцагчийн голч дүн нь 3.2-оос дээш байна.

3.6. Оюутны тэтгэлэг хүсэгч нь боловсролын зээлийн сан болон төрөөс олгож буй тэтгэлэг хөтөлбөрт хамрагдаагүй байх.

3.7 Оюутны тэтгэлэгт хамрагдсан суралцагч нь Аймаг сумаас зохион байгуулж буй нийтийг хамарсан олон нийтийн арга хэмжээнд идэвх, санаачилгатай оролцох үүргийг хүлээнэ.

#### **Дөрөв. Бүрдүүлэх бичиг баримт**

Оюутны тэтгэлэг хүсэгч нь дараах баримт бичгийг бүрдүүлнэ:

- 4.1. Гар өргөдөл
- 4.2. Элсэлтийн ерөнхий шалгалтын батламжийн хуулбар хувь
- 4.3. Бүрэн дунд боловсролын гэрчилгээний хуулбар хувь
- 4.4. I курст элсэж буй анхлан суралцагч нь сургуульд зохих журмын дагуу элссэнийг гэрчлэх эрхийн бичгийн хуулбар хувь
- 4.5. "II, III, IV/ курс ахиж үргэлжлүүлэн суралцагчийн голч дүн 3.2-оос дээш байх ба өмнөх хичээлийн жилийн голч дүнгийн тодорхойлолтыг хавсаргах
- 4.6. Эцэг эх асран хамгаалагч, харгалзан дэмжигчийн болон иргэний үнэмлэхний хуулбар
- 4.7. Багийн Засаг даргын тодорхойлолт
- 4.8.Тус хөтөлбөрийн 3.2 дэх заалтын шаардлагыг хангасан тохиолдолд холбогдох бичиг баримтыг хавсаргах.
- 4.9. Эцэг эх асран хамгаалагчийн сүүлийн 1-2 жилийн НДШ төлөлтийн лавлагааны хуулбар /шаардлагатай тохиолдолд/

#### **Тав. Санхүүжилт**

5.1. Оюутны тэтгэлэг хүссэн суралцагчийн сургалтын төлбөрийг суралцах эрх нь үүсэж баталгаажсан тохиолдолд сургуулийн дансанд шилжүүлнэ.

Жич: /Иргэний дансанд шилжүүлэхийг хориглоно/

5.2. Тэтгэлэгт хамрагдах шийдвэр гарсан суралцагчдын оюутны тэтгэлгийг их дээд сургуулийн сургалтын дансанд 12 дугаар сарын 01 -ний дотор шилжүүлэх ба шилжүүлгийг Баян-Өндөр сумын Засаг даргын Тамгын газрын Санхүү төрийн сангийн хэлтэс хариуцан гүйлгээг шилжүүлнэ..

5.3. Оюутны тэтгэлгийг тухайн онд батлагдсан төсөвт багтаан хөтөлбөрийн шаардлага хангасан суралцагчдад олгоно.

5.4 Оюутны тэтгэлэг нь зөвхөн суралцаж байх хугацаанд олгогдоно.

5.5 Батлагдсан төсвийн 3 хүртэлх хувийг хөтөлбөр сурталчлахтай холбоотой гарах зардлыг санхүүжүүлж болно.

## **Зургаа. Хариуцлага**

6.1.Тэтгэлэгт хамрагдсан суралцагчтай хариуцлагын гуравласан гэрээ байгуулж, гэрээг зөрчсөн тохиолдолд буруутай этгээд холбогдох хуульд заасны дагуу хариуцлага хүлээлгэнэ.

## **Долоо. Хэрэгжилтэд хяналт тавих, дүгнэх**

7.1 Хөтөлбөрийн үр дүн санхүүгийн тайлан мэдээллийг Засаг даргын үйл ажиллагааны хөтөлбөрийн жилийн эцсийн хэрэгжилтийн тайлантай хамтатган сумын иргэдийн Төлөөлөгчдийн Хуралд тайлагнана.

## **Найм. Бусад**

8.1. Оюутны тэтгэлэгтэй холбогдон гарсан маргааныг холбогдох хууль тогтоомж болон дүрэм, журмаар зохицуулна.

8.2. Хугацаа хожимдуулсан болон баримт бичгийн бүрдэл дутуу материалыг хүлээн авахгүй.

---oOo---